

# **Aratea**

Caludius Caesar Germanicus

Ab Iove principium magno deduxit Aratus,  
 carminis at nobis, genitor, tu maximus auctor,  
 te veneror, tibi sacra fero doctique laboris  
 primitias. probat ipse deum rectorque satorque. 5  
 quantum etenim possent anni certissima signa,  
 qua sol ardentem cancrum rapidissimus ambit  
 diversasque secat metas gelidi capricorni  
 quave aries et libra aequant divortia lucis,  
 si non tanta quies, te praeside, puppibus aequor  
 cultorique daret terras, procul arma silerent? 10  
 nunc vacat audacis in caelum tollere vultus  
 sideraque et mundi varios cognoscere motus,  
 navita quid caveat, quid scitus vitet arator,  
 quando ratem ventis aut credat semina terris.  
 haec ego dum Latiis conor praedicere Musis, 15  
 pax tua tuque adsis nato numenque secundes!  
 Cetera, quae toto fulgent vaga sidera mundo,  
 indefessa trahit proprio cum pondere caelum.  
 axis at immotus semper vestigia servat  
 libratasque tenet terras et cardine firmo 20  
 orbem agit. extremum geminus determinat axem,  
 quem Grai dixere polon; pars mersa sub undas  
 oceani, pars celsa sub horrifero aquilone.  
 Axem Cretaeae dextra laevaue tuentur  
 sive arctoe seu Romani cognominis ursae 25  
 plaustrave, quae facies stellarum proxima vero:  
 tres temone rotisque micant sublime quaternae.  
 si melius dixisse feras, obversa refulgent  
 ora feris; caput alterius super horrida terga  
 alterius lucet; pronas rapit orbis in ipsos 30  
 declivis umeros. veteri si gratia famae,  
 Cresia vos tellus aluit, moderator Olympi  
 donavit caelo; meritum custodia fecit,  
 quod fidae comites prima incunabula magni  
 foverunt Iovis, attonitae cum furta parentis 35  
 aerea pulsantes mendaci cymbala dextra,  
 vagitus pueri patrias ne tangeret auris,  
 Dictaei texere adytis famuli Corybantes.  
 hinc Iovis altrices Helice Cynosuraque fulgent.  
 dat Grai Helice cursus maioribus astris, 40  
 Phoenicas Cynosura regit. sed candida tota  
 et liquido splendore Helice nitet; haut prius ulla,  
 cum sol oceano fulgentia condidit ora,  
 stella micat caelo, septem quam Cresia flammis.  
 certior est Cynosura tamen sulcantibus aequor, 45  
 quippe brevis totam fido se cardine vertit

Sidoniamque ratem numquam spectata fefellit.  
 Has inter medias abrupti fluminis instar  
 immanis serpens sinuosa volumina torquet  
 hinc atque hinc superaue illas mirabile monstrum. 50  
 cauda Helicen supra tendit, redit ad Cynosuran  
 squamigero lapsu; qua desinit ultima cauda,  
 hac caput est Helices; flexu comprehenditur alto  
 serpentis Cynosura; ille explicat amplius orbes  
 sublatusque retro maiorem respicit arcton. 55  
 ardent ingentes oculi, cava tempora claris  
 ornantur flammis, mento sedet unicus ignis.  
 tempus dexterius qua signat stella draconis  
 quaque sedet mentum, lucetque novissima cauda  
 extremumque Helices sidus micat. hac radiatur 60  
 serpentis declive caput, qua proxima signa  
 occasus ortusque uno tanguntur ab orbe,  
 oceani tumidis ignotae fluctibus arctoe,  
 semper inocciduis servantem ignibus axem.  
 Haud procul effigies inde est defecta labore. 65  
 non illi nomen, non magni causa laboris,  
 dextro namque genu nixus diversaue tendens  
 bracchia, suppliciter passis ad numina palmis.  
 serpentis capiti figit vestigia laeva.  
 Tum fessi subter costas atque ardua terga 70  
 clara Ariadnaeo sacratast igne corona,  
 hunc illi Bacchus thalami memor addit honorem.  
 terga nitent stellis, at qua se vertice tollit  
 succiduis genibus lassum et miserabile sidus,  
 hac ophiuchus erit longe caput ante notabis 75  
 et vastos umeros, tum cetera membra sequuntur.  
 illis languet honos, umeris manet integer ardor,  
 luna etiam mensem cum pleno dividit orbe.  
 lux tenuis manibus, per quas elabatur anguis,  
 pressus utraque manu, medium cingens ophiuchum. 80  
 scorprios ima pedum tangit, sed planta sinistra  
 in tergo residet, vestigia dextera pendent.  
 impar est manibus pondus, nam dextera parvam  
 partem anguis retinet, per laevam attollitur omnis,  
 quantumque ab laeva distantia certa notantur, 85  
 erigitur tantum serpens atque ultima mento  
 ste]lla sub aetheria lucet crinita corona.  
 at qua se dorso sinuabit lubricus anguis  
 insigni caelum perfundent lumine chelae.  
 Ipsam Helicen sequitur senior baculoque minatur, 90  
 sive ille arctophylax seu Bacchi ob munera caesus  
 Icarus ereptam pensavit sidere vitam.  
 non illi obscurum caput est, non tristia membra,  
 sed proprio tamen una micat sub nomine flamma,  
 arcturum dixere, sinus qua vincula nodant. 95

Virginis inde subest facies, cui plena sinistra  
 fulget spica manu maturisque ardet aristis.  
 quam te, diva, vocem? tangunt mortalia si te  
 carmina nec surdam praebes venerantibus aurem,  
 exosa heu mortale genus, medio mihi cursu           100  
 stabunt quadrupedes et flexis laetus habenis  
 teque tuumque canam terris venerabile numen.  
 Aurea pacati regeres cum saecula mundi,  
 Iustitia inviolata malis, placidissima virgo,  
 sive illa Astraevi genus es, quem fama parentem           105  
 tradidit astrorum, seu vera intercudit aevo  
 ortus fama tui, mediis te laeta ferebas  
 sublimis populis nec dedignata subire  
 tecta hominum et puros sine crimine, diva, penatis  
 iura dabas cultuque novo rude vulgus in omnem           110  
 formabas vitae sinceris artibus usum.  
 nondum vesanos rabies nudaverat ensis  
 nec consanguineis fuerat discordia nota,  
 ignotique maris cursus privataque tellus  
 grata satis, neque per dubios avidissima ventos           115  
 spes procul amotas fabricata nave petebat  
 divitias, fructusque dabat placata colono  
 sponte sua tellus nec parvi terminus agri  
 praestabat dominis, sine eo tutissima, rura.  
 At postquam argenti crevit deformior aetas           120  
 rarius invisit maculatas fraudibus urbis  
 seraque ab excelsis descendens montibus ore  
 velato tristisque genas abscondita rica,  
 nulliusque larem, nullos adit illa penatis.  
 tantum cum trepidum vulgus coetusque notavit           125  
 increpat "o patrum suboles oblita priorum,  
 degeneres semper semperque habitura minores,  
 quid me, cuius abit usus, per vota vocatis?  
 quaerenda est sedes nobis nova, saecula vestra  
 artibus indomitis tradam scelerique cruento";           130  
 haec effata super montis abit alite cursu,  
 attonitos linquens populos graviora paventis.  
 Aerea sed postquam proles terris data nec iam  
 semina virtutis vitiis demersa resistunt  
 ferrique invento mens est laetata metallo           135  
 polluit et taurus mensas assuetus aratro,  
 deservit propere terras iustissima virgo  
 et caelist sortita locum, qua proximus illi  
 tardus in occasum sequitur sua plaustra Bootes.  
 Virginis at placidae praestanti lumine signat           140  
 stella umeros. Helicen ignis non clarior ambit,  
 quique micat cauda quique armum fulget ad ipsum  
 quique priora tenet vestigia quique secunda  
 clunibus hirsutis et qui sua sidera reddit,

namque alii, quibus expletur cervixque caputque, 145  
 vatibus ignoti priscis sine honore feruntur.  
 Qua media est Helice, subiectum respice cancrum;  
 at capiti suberunt gemini. qua posterior pes,  
 horrentisque iubas et fulvum cerne leonem.  
 hunc ubi contigerit Phoebi violentior axis, 150  
 accensa in cancro iam tum geminabitur aestas.  
 tunc lymphae tenues, tunc est tristissima tellus  
 et densas laetus segetes bene condit arator.  
 ne mihi tunc remis pulset vada caerulea puppis;  
 dem potius ventis excusso vela rudente 155  
 excipiamque sinu zephyris spirantibus auras.  
 Est etiam aurigae facies, sine Atthide terra  
 natus Erichthonius, qui primus sub iuga duxit  
 quadrupedes, seu Myrtoas demersus in undas  
 Myrtilos. hunc potius species in sidere reddit, 160  
 sic nulli currus, sic ruptis maestus habenis  
 perfidia Pelopis raptam gemit Hippodamiam.  
 ipse ingens transversus abit laeva geminorum  
 maiorisque ursae contra delabitur ora.  
 numina praeterea secum trahit, una putatur 165  
 nutrix esse Iovis, si vere Iuppiter infans  
 ubera Cretaeae mulsit fidissima caprae,  
 sidere quae claro gratum testatur alumnum.  
 hanc Auriga umero totam gerit, at manus haedos  
 ostendit, nautis inimicum sidus, ubi illos 170  
 orbis ab oceano celsos rapit; haut semel haedi  
 iactatam videre ratem nautasque paventis  
 sparsaque per saevos morientum corpora fluctus.  
 Aurigae pedibus trux adiacet ignea taurus,  
 cornua fronte gerens et lucidus ore minaci. 175  
 quamlibet ignarum caeli sua forma docebit,  
 et caput et patulae naris et cornua tauri.  
 fronte micant hyades. qua cornus flamma sinistri  
 summa tenet, subit haec eadem vestigia dextra  
 aurigae mediaque ligat compagine divos. 180  
 Myrtilos exoritur summo cum fluctibus ore,  
 totus cum tauro lucet; ruit oceano bos  
 ante, super terras cum fulget Myrtilos ore.  
 Iasides etiam caelum cum coniuge Cepheus  
 ascendit totaque domo, quia Iuppiter auctor 185  
 est generis: prodest maiestas saepe parentis.  
 ipse brevem patulis manibus stat post Cynosuram  
 diducto passu. quantum latus a pede dextro  
 Cepheos extremam tangit Cynosurida caudam,  
 tantundem ab laevo distat; minor utraque iungit 190  
 regula Cepheos vestigia. balteus ambit  
 qua latus, ad flexum sinuosi respicit anguis.  
 Cassiepia virum residet sublimis ad ipsum,

clara, etiam pernox caelo cum luna refulsit,  
 sed brevis et paucis decorata in sidere flammis. 195  
 qualis ferratos subicit clavicula dentes,  
 succutit et foribus praeducti vincula claustris,  
 talis disposita est stellis. ipsa horrida vultu  
 sic tendit palmas, ceu sit planctura relictam  
 Andromedam, merita non iusta piacula matris. 200  
 Nec procul Andromede, totam quam cernere posse  
 obscura sub nocte licet, sic emicat ore,  
 sic magnis umeris candet nitor. hanc media ab it  
 ignea substricta lucet qua zonula palla.  
 sed poenae facies remanet districtaque pandit 205  
 brachia, ceu duri teneantur robore saxi.  
 Andromedae capiti sonipes supereminet ales,  
 vertice et Andromedae radiat quae stella, sub ipsa  
 alvo fulget equi, tres arcos et latera aequis  
 distinguunt spatii, capiti tristissima forma 210  
 et cervix sine honore obscuro lumine sordet.  
 spumanti mandit sed qua ferus ore lupata,  
 et capite et longa cervice insignior exit  
 stella nitens armis laterique simillima magno.  
 nec totam ille tamen formam per singula reddit. 215  
 primo praestat equum, medio rupta ordine membra  
 destituunt visus, rudis inde adsurgit imago.  
 Gorgonis hic proles. in Pierio Helicone,  
 vertice cum summo nondum decurreret unda,  
 Museos fontis dextri pedis ictibus hausit. 220  
 inde liquor genitus nomen tenet Hippocrenes;  
 fontes nomen habent. sed Pegasus aethere summo  
 velocis agitat pennas et sidere gaudet.  
 Inde subest aries, qui longe maxima currens  
 orbe suo spatia ad finem non tardius ursa 225  
 pervenit et quanto graviore Lycaonis arctos  
 axem actu torquet, tanto perniciosior ille  
 distantis cornu properat contingere metas.  
 clara nec est illi facies nec sidera possunt,  
 officiat si luna, sua virtute nitere. 230  
 sed quaerendus erit zonae e regione micantis  
 Andromedae; terit hic medii divortia mundi,  
 ut chelae, candens ut balteus Orionis.  
 Est etiam propiore deum cognoscere signo,  
 deltoton si quis donum hoc spectabile Nili 235  
 divitibus generatum undis in sede notabit.  
 tris illi laterum ductus, aequata duorum  
 sunt spatia, unius brevior, sed clarior igne.  
 hunc aries iuxta. medium deltoton habebit  
 inter lanigeri tergum et Cepheida maestam. 240  
 Huc ultra gemini pisces, quorum alter in austrum  
 tendit, Threicium boream petit alter et audit

stridentis auras, niveus quas procreat Haemus.  
 non illis liber cursus, sed vincula cauda  
 singula utrumque tenent uno coeuntia nodo. 245  
 nodum stella premit. piscis, qui respicit auras  
 Threicias, dextram Andromedae cernetur ad ulnam.  
 Subter utrumque pedem devotae virginis ales  
 Perseos effigies, servatae grata puellae.  
 moles ipsa Çiri satis est testata parentem, 250  
 tantus ubique micat, tantum occupat ab Iove caeli.  
 dextra sublata solium prope Cassiepie  
 sublimis fulget pedibus properare videtur  
 et velle aligeris purum aethera findere plantis.  
 Poplite sub laevo, tauri certissima signa, 255  
 Pleiades suberunt brevis et locus occupat omnes,  
 nec faciles cerni, nisi quod coeuntia plura  
 sidera communem ostendunt ex omnibus ignem.  
 septem traduntur numero, sed carpitur una,  
 deficiente oculo distinguere corpora parva. 260  
 nomina sed cunctis servavit fida vetustas:  
 Electra Alcyoneque Celaenoque Meropeque  
 Asteropeque et Taygete et Maia parente  
 caelifero genitae, si vere sustinet Atlas  
 regna Iovis superosque atque ipso pondere gaudet. 265  
 lumine non multis Plias certaverit astris,  
 praecipuo sed honore ostendit tempora bina,  
 cum primum agricolam ventus \*super immovet atri  
 et cum surgit hiems, portu fugienda peritis.  
 Quin etiam lyra Mercurio dilecta, deorum 270  
 \*plurimum acceperat prohs caelo nitet ante labore  
 devictam effigiem planta erecta \*quoque dextra  
 tempora laeva premit torti subiecta draconis.  
 summa genu subvorsa tenet, qua se lyra volvit.  
 Contra spectat avem vel Phoebi quae fuit olim 275  
 cygnus vel Ladae thalamis qui illapsus adulter  
 furta Iovis falsa volucer sub imagine textit.  
 inter defectum sidus cygnumque nitentem  
 Mercurialis habet sedem Lyra. multa videbis  
 stellarum vacua in cygno, multa ignea rursus 280  
 aut medii fulgoris erunt. penna utraque laeta,  
 dexterior iuxta regalem Cepheos ulnam,  
 at laeva fugit instantem sibi Pegason ala.  
 piscibus interlucet equi latus, ad caput eius,  
 dextra manus latices qua fundit, aquarius exit. 285  
 quo prior aegoceros semper properare videtur  
 oceano mersus sopitas condere flammis.  
 tum brevis occasus ortusque intercipit hora,  
 cum sol ambierit metas gelidi capricorni.  
 nam neque perficiet cursus et vota brevis lux, 290  
 et cum terrores auget nox atra marinos,

multum clamatos frustra exspectaveris ortus.  
 tunc rigor aut rapidus ponto tunc incubat auster;  
 pigra ministeria, et nautis tremor alligat artus.  
 sed rationem animi temeraria pectora solvunt, 295  
 nulla dies oritur, quae iam vacua aequora cernat  
 puppibus, et semper tumidis ratis innatat undis.  
 in terra temptare undas iuvat, aspera sed cum  
 adsultat lateri deprensae spuma carinae,  
 tunc alii curvos prospectant litore portus 300  
 inventasque alii terras pro munere narrant,  
 interea exanimat pavidos instantis aquae mons.  
 ast alii procul a terra iactantur in altum,  
 munit eos breve lignum et fata instantia pellit,  
 nam tantum a leto, quantum rate fluctibus, absunt. 305  
 Belligeri Titan magnum cum contigit arcum  
 ducentemque ferum sinuato spicula nervo,  
 iam clausum ratione mare est, iam navita portu  
 infestam noctem fugitat longasque tenebras.  
 signum erit exoriens nobis tum nocte suprema 310  
 scorpios, ille micat super freta caerulea cauda.  
 insequitur gravis arcus et in lucem magis exit.  
 tunc alto Cynosura redit, tunc totus in undas  
 mergitur Orion, umeris et vertice Cepheus.  
 Est etiam, incertum quo cornu missa sagitta, 315  
 quam servat Iovis ales. habet miracula nulla,  
 si caelum ascendit Iovis armiger. hic tamen arvo  
 unguibus innocuis Phrygio rapuit Ganymeden  
 et telo appositus custos, cum Iuppiter arsit  
 in puero, luit excidio quem Troia furorem. 320  
 Delphin inde brevis lucet iuxta capricornum  
 paucis sideribus, tulit hic Atlantida Nymphen  
 in thalamos, Neptune, tuos, miseratus amantem.  
 Sidera, quae mundi pars celsior aethere volvit  
 quaeque vident boream ventis adsueta serenis, 325  
 diximus. hinc alius declivis ducitur ordo,  
 sentit et insanos obscuris flatibus austros.  
 Primus in obliquum rapitur sub pectore tauri  
 Orion. non ulla magis vicina notabit  
 stella virum, sparsae quam toto corpore flammae; 330  
 tale caput, magnisque umeris sic balteus ardet,  
 sic vagina ensis, pernici sic pede lucet.  
 talis ei custos aderit canis ore timendo.  
 ore vomit flammam, membris contemptior ignis.  
 Sirion hunc Grai proprio sub nomine dicunt. 335  
 cum tetigit solis radios, accenditur aestas,  
 discernitque ortu longe sata, vivida firmat,  
 at quibus adfectae frondes aut languida radix,  
 exanimat. nullo gaudet maiusve minusve  
 agricola et sidus primo speculatur ab ortu. 340



Auritum leporem sequitur canis et fugit ille,  
 sic utrumque oritur, sic occidit in freta sidus.  
 tu parvum leporem rimare sub Orione.  
 At qua cauda canis languenti desinit astro,  
 fulgent Argoae stellis aplustria puppis, 345  
 puppe etenim trahitur, non recto libera cursu,  
 ut cum decurrens inhihet iam navita remos  
 aversamque ratem votis damnatus ad oram  
 perligat, optatam cupiens contingere terram.  
 sed quia pars violata fuit, coeuntia saxa 350  
 numine Iunonis tutus cum fugit Iason,  
 haec micat in caelo, lateri non amplior auctus,  
 quam surgit malus; qua debet reddere proram,  
 intercepta perit nulla sub imagine forma;  
 puppis demisso tantum stat lucida clavo. 355  
 Haud procul expositam sequitur Nereia pristis  
 Andromedam. media est Solis via, cum tamen illa  
 terretur monstro pelagi gaudetque sub axe  
 diverso posita et boreae vicina legenti.  
 auster pristin agit. duo sidera perlegit unum, 360  
 namque aries supra pristin piscesque feruntur.  
 belua sed ponti non multum praeterit amnem,  
 amnem, qui Phaethonta suas deflevit ad undas,  
 postquam patris equos non aequo pondere rexit,  
 vulnere reddentem flammam Iovis; hunc, nova silva, 365  
 planxere ignotis maestae Phaethontides ulnis.  
 Eridanus medius liquidis interiacet astris.  
 huius pars undae laevum ferit Orionis  
 lapsa pedem. procul ambobus qui piscibus unus  
 vincula conecit, nodus cristam super ipsam 370  
 aequoreae pristis radiat. sunt libera caelo  
 sidera non ullam specie reddentia formam  
 sub leporis latus aversam post denique puppim  
 inter et Eridani flexus clavumque carinae.  
 atque haec ipsa notast nullam praebere figuram, 375  
 sunt etenim toto sparsi sine nomine mundo  
 inter signa ignes, quibus etsi propria desit  
 forma, per appositi noscuntur lumina signi.  
 Est etiam a geminis diversus piscibus unus,  
 qui borean fugitat, totus directus in austros, 380  
 ventre sub aegoceri, pristin conversus ad imam.  
 infimus hydrochoos sed qua vestigia figit,  
 sunt aliae stellae; qua caudam belua flectit  
 quaque caput piscis, media regione locatae  
 nullum nomen habent nec causast nominis ulla, 385  
 sic tenuis cunctis iam paene evanuit ardor.  
 nec procul hinc dextra defundit aquarius undas  
 atque imitata cadunt errantis signa liquoris.  
 e quibus una magis sub cauda flamma relucet

squamigeræ pristis, pedibus subit altera signi 390  
 fundentis latices. est et sine honore corona  
 ante sagittiferi paullum pernicia crura.  
 Scorpions erecta torquet qua spicula cauda,  
 turibulum vicinum austris sacro igne videbis  
 arcturum contra; sed quanto tardius ille 395  
 oceanum occasu tangit, tanto magis artæ  
 turibuli metæ. vix caelum suspicit et iam  
 præcipiti tractu vastis dimittitur undis.  
 multa dedit natura homini rata signa salutis  
 venturamque notis cladem depellere suasit. 400  
 inter certa licet numeres sub nocte cavenda  
 turibulum, nam si sordebunt cetera cæli  
 nubibus obductis, illo splendente, timeto,  
 ne pacem pelagi solvat violentior auster.  
 tunc mihi \*siccentur substricto cornua velo 405  
 et rigidi emittant flatum per inane rudentes.  
 quod si depressæ turbavit linthea puppis  
 incubuitque sinu laxo, vel mergitur undis  
 prona ratis sorbetque inimicum Nereæ prora,  
 vel si respexit servator Iuppiter, aegre 410  
 ultima persolvunt iactati vota salutis;  
 nec metus ante fugit, quam pars effulserit orbis,  
 quæ boream cælum spectantibus indicet ortum.  
 Sunt etiam flammis commissæ immania membra  
 Centauri, capite atque hirsuto pectore et alvo 415  
 subter candentis hominem reddentia chelas,  
 inde per ingentis costas, per crura, per armos,  
 nascitur intacta sonipes sub virgine. dextra  
 seu prædam e silvis portat seu dona propinquæ  
 placatura deos, cultor Iovis, admovet aræ, 420  
 hic erit ille pius Chiron, iustissimus omnis  
 inter nubigenas et magni doctor Achillis.  
 hic umero medium scindens iter ætheris alti,  
 si tenuem traxit nubem stellasque recondit,  
 toto clarus equo venientis nuntiat euros. 425  
 Nec procul hinc hydros trahitur, cui cauda superne  
 Centaurum lucet, tractu subit ille leonem,  
 pervenit ad cancrum capite et tria sidera tangit.  
 huic primos tortus crater premit, ulterioris  
 vocali rostro corvus forat. omnia lucent, 430  
 et corvus pennis et parvo pondere crater  
 et spatium triplicis formatus sideris hydros.  
 Sub geminis procyon fulgenti lumine surgit.  
 Hic cælo ornatus trahitur noctemque diemque;  
 sors sua cuique data est; semel adsignata tuentur 435  
 immoti loca nec longo mutantur in ævo.  
 quinque aliae stellæ diversa lege feruntur  
 et proprio motu mundo contraria volvunt

curricula exceduntque loco et vestigia mutant.  
 haud equidem possis alio contingere signo, 440  
 quae divis sedes. hinc atque hinc saepe videntur  
 occasus ortusque. neque anfractus brevis illis,  
 annosasque vias tardus vix perficit orbis.  
 hoc opus arcanis si credam postmodo Musis,  
 tempus et ipse labor, patiantur fata, docebit. 445  
 Signorum partis, quorum est praedicta figura,  
 annum expleturi praecidunt quattuor orbis.  
 intervalla trium transversus colligat unus.  
 nec par est illis spatium: duo namque feruntur  
 inter se aequales; duo, quorum est maxima forma; 450  
 et totidem rursus praedictis ante minores.  
 hi semper distant, illos communia signa  
 committunt. qua se tangunt, pars aequa rotarum  
 dividitur, binos ut si qui desecet arcus.  
 Dissimilis quintus liquida sub nocte videtur, 455  
 sidera cum reddunt sinceros eminus ignis.  
 lactis ei color, et mediis via lucet in umbris.  
 Lacteus hic orbis nullo minor orbe rotatur.  
 Celsior ad boream qui vergit circulus altos  
 et peragit tractus vicinis haud procul ursis, 460  
 per geminos currit medios, vestigia tangit  
 aurigae plantamque terit Perseida laevam,  
 transversae Andromedae latera utraque persecat actus  
 et totam abs umero dextram; summa ungula pulsu  
 acris equi ferit orbis iter. tunc candidus ora 465  
 cygnus habet iuxta, cubito lucet super ipsum  
 nixa genu facies et primis ignibus anguis.  
 effugit at virgo; totus leo, totus in ipso  
 cancer. ab adversis omnem secat ille leonem  
 clunibus hirsutique iubam per pectoris exit, 470  
 cancro fulgentes oculi, ceu regula currat  
 per medios, sic divisi latera utraque tangunt.  
 hunc octo in partis si quis diviserit orbem,  
 quinque super terras semper fulgere notabit,  
 abdi tres undis brevibusque latere sub umbris. 475  
 hoc cancrum tetigit cum Titan orbe, timeto  
 aestatem rapidam et solventis corpora morbos.  
 tunc habet aeterni cursus fastigia summa  
 erectoque polo brevius non adplicat umquam  
 candentis currus. adverso nititur orbe, 480  
 dum tangat metas; pronus devolvitur inde.  
 Hic boreae propior, contrarius excipit austros;  
 aegoceros metas hiemis glacialibus austris  
 aestatisque tenet flagrantia sidera cancer.  
 hoc medium sidus findit devexior orbis, 485  
 fundentis latices genua implicat; illigat illum  
 intorta pristis cauda; velocia crura

contingit leporis, canis alvum desecat imam.  
 desecat et sacrae speciosa aplustria puppis  
 Centaurique umeros et scorpion ultima cauda                   490  
 spicula torquentem; magnus micat arcus in illo.  
 inde austro propior sol est aquilone relicto  
 et gelidas hiemes hebetato lumine portat.  
 huius tres caelo partes adsurgere cernes,  
 quinque latent undis et longa nocte feruntur.                   495  
 Hos inter medius nullo minor orbis agetur,  
 in quo cum Phoebus radiatos extulit ignes,  
 dividit aequali spatio noctemque diemque.  
 bis redit haec facies, librato sidere, mundo,  
 cum ver fecundum surgit, cum deficit aestas.                   500  
 signa aries taurusque aequo tanguntur ab orbe,  
 sed princeps aries totus fulgebit in illo,  
 tauri armum subit et flexi duo sidera cruris.  
 at medium Oriona secat spiramque priorem  
 hydri et crateram levem corvique forantis                   505  
 ultima, deficiunt nigra qua sidera cauda.  
 illic et chelas transverso lumine quaeres  
 et celsi partem anguis et a medio ophiuchum  
 nec procul inde aquilam, toto capite incubat ardens  
 Pegasus et longae spatio cervicis inhaeret.                   510  
 hos orbis, quorum tractus et signa notamus,  
 rectus per medios percurrens traicit axis.  
 tres intervallis paribus sine fine rotantur  
 nec mutare vias possunt nec iungere sulcos.  
 quartus in obliquum tris unus colligat orbis,                   515  
 partibus extremis diversos implicat; unum  
 inter utrumque secat medium desectus ab illo.  
 non si Palladia doctus formaret ab arte,  
 distantis orbis melius religasset ab uno.  
 sed tribus idem ortus omni nascuntur ab aevo                   520  
 atque eadem occasus remanent certissima signa.  
 Quartus ab oceano tantum vestigia mutat,  
 obliquo currens spatio, quantum capricornus  
 aestifero distat cancro, quam latus ad auras  
 aetherias surgit, tam sacris mergitur undis.                   525  
 in sex signiferum si quis diviserit orbem  
 aequalis partes, succumbet regula binis  
 inferior signis spatii tantumque tenebit  
 una, sui lateris quantum a tellure recedit;  
 nec tamen humanos visus fugit ultimus orbis.                   530  
 haec via solis erit bis senis lucida signis.  
 nobilis hic aries aurato vellere, quondam  
 qui tulit in Tauros Phrixum, qui prodidit Hellen,  
 quem propter fabricata ratis, quem perfida Colchis  
 sopito vigile incesto donavit amori.                   535  
 corniger hic taurus, cuius decepta figura

Europe, thalamis et virginitate relicta,  
 per freta sublimis tergo mendacia sensit  
 litora, Cretaeo partus enixa marito.  
 sunt gemini, quos nulla dies sub Tartara misit;                   540  
 sed caelo semper, nautis laetissima signa,  
 Ledaeos statuit iuvenis pater ipse deorum.  
 te quoque, fecundam meteret cum comminus hydram  
 Alcides ausum morsu contingere \*bello  
 sidere donavit, cancer, Saturnia Iuno,                   545  
 numquam oblita sui, numquam secunda noverca.  
 hinc Nemeaeus erit iuxta leo; tunc pia virgo;  
 scorprios hinc duplo quam cetera possidet orbe  
 sidera, per chelas geminato lumine fulgens,  
 quem mihi diva cavet dicto prius Orione.                   550  
 inde sagittifero tentus curvabitur arcus,  
 qui solitus Musas venerari supplice plausu  
 acceptus caelo Phoebis ardet in armis.  
 cochlidis inventor, cuius Titania flatu  
 proelia commisit divorum laetior aetas                   555  
 bellantem comitata Iovem, pietatis honorem,  
 ut fuerat geminus forma, sic sidere, cepit.  
 hic, Auguste, tuum genitalem corpore numen  
 attonitas inter gentis patriamque paventem  
 in caelum tulit et maternis reddidit astris.                   560  
 proximus infestas, olim quas fugerat, undas  
 Deucalion parvam defundens indicat urnam.  
 annua concludunt Syriae duo numina piscis  
 tempora; tunc iterum praedictus nascitur ordo  
 lanigeri et tauri, geminorum, postea cancri,                   565  
 tunc leo, tunc virgo, tunc scorprios, arcitenensque  
 et gelidus capricornus et imbrifer et duo pisces.  
 huius quantum altas demergitur orbis in undas  
 oceani, tantum liquidum super aera lucet.  
 nullaque nox bis terna minus caelo trahit astra,                   570  
 nullaque maior erit, quam quanto tempore in auras  
 orbis perfecti divisus tollitur arcus.  
 Saepe velis quantum superet cognoscere noctis,  
 et spe venturae solari pectora lucis.  
 prima tibi nota solis erit, quo sidere currat,                   575  
 semper enim signo Phoebus radiabit in uno.  
 cetera tunc propriis ardentia suspice flammis,  
 quod cadat aut surgat summove feratur in orbe,  
 quantoque exilient spatio, cum caerulea linquent;  
 namque aliis pernix saltus, maiore trahuntur                   580  
 mole alia, oceanum tardo linquentia passu.  
 quod si nube cava solis via forte latebit,  
 occulet aut signum conscendens vertice caelum  
 altus Athos vel Cyllene vel candidus Haemus,  
 Gargaron aut Ide superisve agitatus Olympus,                   585

tunc dextra laevaue simul redeuntia signis  
sidera si noris, numquam te tempora noctis  
effugient, numquam veniens Tithonius ortus.  
Cum primum cancrum Tethys emittit in auras,  
excipit oceanus Minoaeserta coronae 590  
occidit et dorso piscis caudaque priore,  
mergitur in totos umeros ophiuchus et anguis  
ultima cauda micat, tortus habet illa timendos.  
nec multo arctophylax hunc longe subiacet astro,  
lumine qui primo cum scorpius occidit undis 595  
occulitur pedibus; durat tamen arduus ore,  
dum rigidum aegoceri signum freta lucida terret.  
siderea vix tum satiatu luce bootes  
in terras abit et noctis plus parte relinquit.  
at contra nullo defectus lumine totus 600  
Orion umeris splendebit magnaue divi  
vagina et claro caelatus balteus igni.  
cornua et Eridanus liquido feret utraque caelo.  
At cum prima iuba radiarit flamma leonis,  
quicquid parte micat caelo, hoc nascente sub undas 605  
omne abit atque feri venientis defugit ora.  
tota Iovis mersa est pennis stellantibus ales,  
quique genu posito defessus conditur undis  
crure tenus; redit in caelum vasti caput hydri  
et pernix lepus et procyon et Sirius ipse 610  
totiusque canis rabidi vestigia prima.  
Accipe quae vitent exorsae virginis ora:  
delphinus notis iam tum deflexerit undis  
et lyra dulce sonans et flammis cincta sagitta  
et niveus cygnus properarit tangere fluctus, 615  
utraque penna volans caudam vix lucet ad ipsam,  
nigrescitque Padus, terrae qui proximus amnis.  
tum caput abscondet sonipes, tum tota latebit  
cervix, at contra sublimior hydra feretur  
cratera tenus et surgent aplustria puppis 620  
Argoae totusque canis; sed cum pia virgo  
nascitur, illa ratis media plus arbore lucet.  
Surgentis etiam chelas sua signa notabunt:  
exilit oceano nunc toto crine bootes,  
quem claro veniens arcturus nuntiat ore, 625  
celsaque puppis habet, cauda minus attamen hydra,  
nixa genu species flexo rediit ardua crure,  
partibus haud aliis; nocte eluctata suprema  
bis solet illa una caelo se ostendere nocte,  
nam si Phoebeos currus, dum longa venit nox, 630  
occasu sequitur, rursus fugit oceanum ortu  
crure simul chelis fulgens. cum scorpius exit,  
iam totis radiat membris miserabile sidus;  
at cum tantum abiit, quantum lyra surgit ab undis,

arcus ipsa suo caelo referetur imago. 635  
 imperfecta redit caelo tum tota corona  
 et Chiron pius ad caudam cognoscitur imam.  
 Pegasus abscondit toto tunc pectore pennas  
 nec lucet cauda praemersus pectore cygnus.  
 abdit et Andromede vultus et maxima pristis 640  
 occasu insequitur metuentis virginis ora,  
 crista super caelo fulget. caput abditur ipse  
 regalis Cepheus alias intactus ab undis.  
 Scorpios exoriens, cum clarus fugerit amnis,  
 scorpios Oriona fugat, pavet ille sequentem. 645  
 sis vati placata, precor, Latonia virgo;  
 non ego, non primus, veteres cecinere poetae,  
 virginis intactas quondam contingere vestes  
 ausum hominem divae sacrum temerasse pudorem.  
 devotus poenae tunc impius ille futurae 650  
 nudabatque feris angusto stipite silvas  
 pacatamque Chion dono dabat Oenopioni.  
 haud patiens sed enim Phoebi germana repente  
 numinis ultorem media tellure revulsa  
 scorpion ingenti maiorem contulit hostem. 655  
 parcite, mortales, numquam levis ira deorum.  
 horret vulnus adhuc et spicula tincta veneno  
 flebilis Orion et quamquam parte relict  
 caeli \*paene fugit, tamen altis mergitur undis,  
 scorpios ardenti cum pectore contigit ortus. 660  
 nil super Andromedae, nil pristis luce fruatur.  
 in caput atque umeros rapit orbis Cassiepiam,  
 declivemque trahunt aeterni pondera mundi  
 corruptaque cadit forma, certaverat olim  
 qua senis aequorei natis, cum litore Canchli 665  
 Doridos et Panopes spectasset stulta choreas.  
 illa abit oceano, totius sarta coronae  
 in caelum redeunt, totum se liberat hydrus.  
 cruribus exspectat Chiron, obscurior arcu,  
 corpore iam toto vasto sub vertice clarus. 670  
 tum fera, quam dextra portat Centaurus, in auras  
 exilit et claris aperitur flexibus anguis;  
 innixumque genu laeva minus aequora relinquunt.  
 At cum prima subit facies remeabilis arcus,  
 iam sicca oceano Chiron pernicia crura 675  
 expulit et celsis ophiuchus fulget in astris.  
 nil trahit obscurum serpens et trunca recepta  
 desinit esse manu membris deformis imago.  
 iam lyra cum superis et cygni dextera penna,  
 radit tellurem rediens cum sidere Cepheus. 680  
 tum canis abscondit totius corporis ignis  
 et latet Orion et semper tutus in undis  
 est lepus Argoaeque ratis, qua flexile signum

in puppim formatur, adhuc aplustria lucent.  
 mergitur et Perseus et caprae nobile lumen. 685  
 Aurigam totum abscondit veniens capricornus  
 atque omnem ornatum venerandae numine puppis.  
 tum procyon obscurus abit; redit armiger uncis  
 unguibus, ante omnis gratus tibi, Iuppiter, ales.  
 omnibus et stellis cygnus redit et leve telum 690  
 et parvus delphinus et apta altaria sacris.  
 Geminus exsurgit Minoia nota corona.  
 Hydrochoos caelum scandens simul evocat ore  
 et cervice tenus fidentem Pegason alis.  
 aversum Chirona trahit nox atra sub undas, 695  
 oceanus caudam tinguat, nondum capit ora,  
 non vastos umeros, non pectora tristia setis.  
 hydram plus mediam condit, pars tertia lucet.  
 Hanc pisces abdunt orti totumque biformem.  
 cum geminos pisces aquilonis provocat aura, 700  
 ille etiam surgit, qui tristis respicit austros;  
 piscibus ille simul surgit, sed liberat ortus,  
 cum pernix aries in caelum cornua tollit.  
 pisces educunt Cepheida; laetior illa  
 Nereidas pontumque fugit caeloque refertur. 705  
 Ortus lanigeri properabunt condere sacrum  
 turibulum; patrio fulgebit in aethere Perseus.  
 Persea cum pennae reddunt, iam Plias ab undis  
 effugit et dextro tauri cognoscitur armo.  
 fixus ut in curru trahitur sine curribus ullis 710  
 Myrtilos. haut totum cernes, non integer ipse  
 in caelum redit, at pars dextera mergitur undis;  
 vertice lucebit, teneros manus efferet haedos.  
 laeva Iovis nutrix umero radiabit in ipso,  
 proxima telluri nascetur planta sinistra. 715  
 cetera cum geminis perfecto sidere surgent.  
 Tauro pistricis pariter cristaeque refulgent  
 caudaque; vicinum terris iam cerne booten.  
 et cum se genibus demisit pars ophiuchi, 720  
 signum erit, oceano geminos remeare relicto.  
 totaque iam pristis lucebunt squamea terga;  
 Eridani et primos deprendat navita fontes,  
 caelum conspiciens, dum claro se movet ortu  
 Orion; habet ille notas, quae tempora noctis  
 significant, ventosve truces fidamve quietem. 725